

TEZAU LITURGIC

9 Iunie

ACATISTUL SF. PREOT ALEXIE MECEV DE LA MOSCOVA



MOSCOVA, 2000



Ака́фист

свято́му пра́ведному Алекси́ю, пресви́теру Моско́вскому

Конда́к 1

Избра́нный уго́днице Христо́в и вели́кий в
ско́рбех помо́щнице, пра́ведне о́тче Алекси́е! К
тебе́ я́ко те́плому предста́телю мы гре́шнии со
дерзнове́нием притека́ем и умиле́нно взыва́ем:
умоли́ о нас всеси́льнаго Бо́га, не попусти́ти нам
блужда́ти по распу́тием грехо́вным, но
просвети́ти сердца́ на́ша све́том твоея́ любви́, да
зове́м ти: Ра́дуйся, пра́ведне ста́рче Алекси́е,
уте́шителю благода́тный.

И́кос 1

А́нгелов Творе́ц яви́ в рождéнии твоéм
моли́твенное заступле́ние святите́ля Филаре́та,
егда́, не могу́щи ма́тери разроди́тися тобо́ю,
роди́тель твой притече́ к нему́, и того́ моли́твою
вшел еси́ в мир сей во вре́мя соверше́ния
Божество́вныя Евхаристи́и, показу́я тем, я́ко
бу́дещи вели́кий служи́тель та́инств церковных.
Сего́ ра́ди взыва́ем ти:

Ра́дуйся, свя́титель Филаре́том
благослове́нный и воспита́нный;

ра́дуйся, от пелён то́го подви́жническому
жити́ю научи́выйся.

Ра́дуйся, о́трасль роди́телей пречестны́х, плод
благый прине́сшая;

ра́дуйся, я́ко изде́тка гла́сом своим Бо́га
прославля́л еси́.

Ра́дуйся, благоговéние и любóвь ко слúжбам
Бо́жиим от отца́ унасле́дивый;

ра́дуйся, от ма́тере твоея́ страннопри́ймство
и попече́ние о бли́жних воспри́емый.

Ра́дуйся, ушеса́ своя́ к пéнию церко́вному от
рожде́ния приклони́вый;

ра́дуйся, во éже не ви́дети суе́ты, очеса́ своя́
в горня́я впери́вый.

Ра́дуйся, пра́ведне ста́рче Алекси́е,
утéшителю́ бла́гостный.

Конда́к 2

Ви́дя Чело́веколю́бец Госпо́дь широту́ се́рдца
твоего́, гото́ваго послужи́ти бли́жним своим, яви́
в благослове́нии ма́тери твоея́ во́лю Свою́, да
бу́деши не врач теле́с, но па́стырь Це́ркве
Христо́вы, врачу́яй ду́ши притека́ющих к тебе́;
темже вси лю́дие, ви́дящи до́брое па́стырство
твое́, взыва́ют Бо́гу: Аллилу́иа.

И́кос 2

Ра́зумом Бо́жественным просвещён, узрёл еси́ путь спасёния во отсечёнии во́ли своея́, егда́ поставлен был еси́ причётником во храм Богома́тере, с ве́лиим терпе́нием восприя́л еси́ суровство нача́льствующаго, и та́ко возрасти́л еси́ в се́рдце твоём пло́д Христо́ва смире́ния. Многоле́тнее твоё терпе́ние сла́вяще, возглаша́ем ти та́ко:

Ра́дуйся, послу́шнице усёрдный;
ра́дуйся, я́ко Бо́гу рабо́тал еси́ неле́нотно.

Ра́дуйся, укорёния и поруга́ния я́ко Бо́жие изволе́ние восприе́мый;
ра́дуйся, осужда́ти и укоря́ти други́х всегда́ избега́й.

Ра́дуйся, облича́ющих нас я́ко благоде́тели почита́ти поуча́й;
ра́дуйся, ра́ди бла́га бли́жних свои́х себе́ утесня́ти призыва́й.

Ра́дуйся, благим супру́жеством своим и нам о́браз честна́го бра́ка явивый;
ра́дуйся, в супру́жнице твоёй до́браго помо́шника на пу́ти Христо́вом обретьи́.

Ра́дуйся, пра́ведне ста́рче Алекси́е,
уте́шителю бла́гостный.

Конда́к 3

Си́ла Вы́шняго о́брете в тебѣ́ сосу́д че́стен и по посв́ященіи во иере́я продо́лжа́ше ве́сти́ тя́ че́рез го́рнило испыта́ний. Служи́л бо еси́ не в ве́си да́льней, я́коже хотя́ше, но во гра́де Москве́, в це́ркви ма́лага прихо́да, иде́же осмь ле́т богомо́льцев не имѣ́в, николи́же возропта́л еси́. Ны́не же предсто́йши со дерзнове́нием Пре́сто́лу Бо́жию, по́я песнь: Аллилу́иа.

И́кос 3

Име́я тща́ние к соверше́нию служб́ це́рковных, на кий́ждо де́нь служе́ние Боже́ственныя Литурги́и учини́л еси́ и к покрову́ Богома́тере и заступни́честву свя́тителя Никола́я прибега́я, весь пу́ть жити́я твоего́ моли́твою оза́рил еси́. Сего́ ра́ди воспева́ем тя́ си́це:

Ра́дуйся, служи́телю алта́ря ре́вностный;
ра́дуйся, я́ко бо́дрствовал еси́ в моли́твенном по́двизе непреста́нно.

Ра́дуйся, в Бо́зе все упова́ние твоѐ полага́вый;

ра́дуйся, в до́лгих испыта́ниях непоколеби́м пребы́вый.

Ра́дуйся, я́ко крест на пе́рси приѐм, плоть свою́ со стра́стьми и похотьми́ Христа́ ради распи́нал еси́;

ра́дуйся, я́ко по возложе́нии епитрахи́ли на
вы́ю твою́, да́ры Ду́ха Свята́го неоску́дно
преподава́л еси́.

Ра́дуйся, я́ко по́ясом препоя́сав чре́сла своя́,
зау́тра на нивы де́лания Госпо́дня изше́л еси́;

ра́дуйся, я́ко взе́мся за ра́ло Христо́во, не
направля́л еси́ вспя́ть стопы́ твоя́.

Ра́дуйся, пра́ведне ста́рче Алекси́е,
уте́шителю бла́гостный.

Конда́к 4

Бу́рю мо́ря жите́йскаго, сластолю́бием,
зло́бою и горды́нею волну́емаго, всем жити́ем
твои́м науча́л еси́ преплыва́ти в кора́блеце
покая́ния, да и мы, явля́юще живу́ю ве́ру и
тре́петную лю́бовь ко Го́споду, сподо́бимся
воспева́ти Ему́ и на небесе́х песнь хвале́бную:
Аллилу́иа.

И́кос 4

Слы́ша о богоуго́дном житии́ твоём, нача́ша
прибегáти к тебе́ и́щущии спасе́ния, обрета́юще
в тебе́ чадолю́биваго отца́ и уте́шителя, ты же
неле́нотно поуча́л еси́ я́ покая́нию и служе́нию
бли́жним самоотрече́нному. Темже и нас, я́коже
и ча́д твои́х, научи́ и́стинному де́ланию на
па́житех душ на́ших, да сла́вим тя благода́ряще:

Ра́дуйся, в век оскуде́ния благоче́стия
несокруши́мым сосу́дом ве́ры яви́выйся;

ра́дуйся, не́леностным пропове́данием
се́мена бла́гих дея́ний се́явый.

Ра́дуйся, я́ко всем скорбя́щим и
отча́явшимся глаша́тай любви́ Бо́жия был еси́;

ра́дуйся, я́ко любви́ю сво́ею ожесточе́нных
зло́бою к пока́нию обра́щал еси́.

Ра́дуйся, навча́я во всех челове́цах о́браз
Бо́жий почита́ти;

ра́дуйся, призыва́я почи́вших неуста́нно
помина́ти.

Ра́дуйся, не отрева́я немощны́х, по си́ле их
де́лание им полага́вый;

ра́дуйся, в постоя́нстве ма́лага де́лания зало́г
духо́внаго возра́стания указа́вый.

Ра́дуйся, пра́ведне ста́рче Алекси́е,
уте́шителю бла́гостный.

Конда́к 5

Звезда́ еси́, на небесе́х свя́тости возсия́вшая,
све́тиши све́тло, в со́нме пра́ведных и
испове́дников Це́ркве Ру́сския зе́млю на́шу
просвеща́я, темже, зря́ще тя, пра́ведне о́тче
Алекси́е, прославля́ем просла́вльшаго тя Го́спода,
зову́ще Ему́: Аллилу́иа.

И́кос 5

Ви́дя, ми́лостиве о́тче, о́крест тебе́ в нищете́
живу́щия, подава́л еси́ им, е́лико имя́ше, упова́я,

я́ко не оста́вит Госпо́дь и дом твой. Даждь и нам
стяжа́ти се́рдце ми́лосе́рдное и научи́ ны
невозбра́нно внима́ти во́ли Бо́жией, да
восхваля́юще глаго́лем ти сицевая́:

Ра́дуйся, я́ко к сокрови́щам земны́м не
прилепля́лся еси́;

ра́дуйся, я́ко небе́сное бога́тство стяжа́л еси́.

Ра́дуйся, ми́лосе́рдием ду́ши на́ша обогаща́ти
науча́яй;

ра́дуйся, некра́домое бога́тство ве́рным
испроша́яй.

Ра́дуйся, све́том Трисо́лнечным се́рдца
челове́ческая просвеща́яй;

ра́дуйся, вы́ну о пользе душе́вной пеки́йся.

Ра́дуйся, рачи́телю целому́дрия;

ра́дуйся, храни́телю чистоты́.

Ра́дуйся, пра́ведне ста́рче Алекси́е,
уте́шителю благода́тный.

Конда́к 6

Пропове́дал еси́ па́стве сво́ей покая́ние и
вкуше́ние безсме́ртныя Трапéзы А́гнчия, да не
вза́лчут бо́лее страсте́й, но воспри́мут мир и
любо́вь Христо́вы и поуча́тся люби́ти бли́жних
свои́х с самоотверже́нием и утесне́нием себе́, да
бла́го им бу́дет, и да вызы́ают ра́достне:
Аллилу́иа.

И́кос 6

Возсия́л еси́ в первопресто́льном гра́де Москвѣ глашата́й жи́зни неветша́ющия, дре́вним отце́м, в пусты́нях подви́завшимся, подо́бный; лю́дем бо, в суетѣ́ пребыва́ющим и разли́чными злоуче́нии прельща́емым, возвеща́л еси́ лю́бовь, милосе́рдие и пра́вду Бо́жию. Таковому́ о тебѣ́ Бо́жию смотре́нию дивя́щеся, вопие́м ти:

Ра́дуйся, неуста́нный пропове́дниче любве́ к Бо́гу и бли́жним;

ра́дуйся, я́ко апо́стольски наставля́л еси́ друг дру́га тяготы́ носі́ти.

Ра́дуйся, во гра́де я́ко в пусты́ни живы́й; ра́дуйся, пусты́ню гра́да бога́тством слез твоих ороша́й.

Ра́дуйся, я́ко пожи́л еси́ в ми́ре премирно́;

ра́дуйся, я́ко вы́ну предстоя́л еси́ Христу́.

Ра́дуйся, ожесточе́нная серде́ц тепло́ю твоея́ любве́ возде́лавый;

ра́дуйся, и ны́не душе́вный поко́й страждущим обрета́ти помога́й.

Ра́дуйся, пра́ведне ста́рче Алексі́е, утѣшителю́ благода́тный.

Конда́к 7

Хотя́ Человеколю́бец Госпо́дь поста́вити тя в трудо́ную го́дину утѣшителя́ скорбя́щих и

страждущих, посла тебе скорбь великую в тяжцей болезни и смерти супружницы твоея, да ничто уже земное не связует сердца твоего, но да приложиши к ревности ревность и приymeши благодать воз благодать, научая пети всех: Аллилуиа.

Икос 7

Новый путь старчества духовнаго во граде Москвѣ яви тебе Господь в словесех праведнаго Иоанна, пресвитера Кронштадтскаго, указуя, да восприymeши всю скорбь человеческую яко свою, молитвою и теплотою любви сию врачуя. Темже и наша скорби отыми от нас, да радуящиеся зываем ти:

Радуйся, праведником кронштадтским на служение страждущим благословенный;

радуйся, яко врач искусный душ человеческих явивыйся.

Радуйся, на страже скорбных сердец человеческих ставый;

радуйся, пастырем добрым обращавшихся к тебе явивыйся.

Радуйся, заблуждших овец к Пастыреначальнику приведый;

радуйся, от волков хищных тех неврежденны сохранивый.

Радуйся, широтою любви твоея всех обымая;

ра́дуйся, на́деяние в Бо́зе полага́ти науча́й.
Ра́дуйся, пра́ведне ста́рче Алексе́е,
уте́шителю благода́тный.

Конда́к 8

Стра́нныя приима́ти тща́ся, при хра́ме своём
прию́т сирота́м учреди́л еси́, назида́я их сло́вом
и житиём своим, да возраста́юще в благо́м
попече́нии и любви́, благода́рственно воспева́ют
Бо́гу: Аллилу́иа.

И́кос 8

Весь Бо́гу предстоя́л еси́, пра́ведне о́тче
Алексе́е, и, посреде́ людей пребыва́я, То́му
рабо́тал еси́, николи́же суето́ю связа́нный. И нас,
в суету́ погруже́нных, научи́ твоему́ в ми́ре
преми́рному жити́ю, да усер́дно тебе́ воспо́им:

Ра́дуйся, де́тскую мла́дость души́ твоея́
сохрани́вый;

ра́дуйся, то́ю млада́я сердца́ к Бо́гу
приводи́вый.

Ра́дуйся, сиротству́щим а́ки чадолю́бивая
ма́терь яви́выйся;

ра́дуйся, овца́м сло́весным па́стырю
преизря́днейший.

Ра́дуйся, ду́ши чад сво́их духо́вных для
ве́чнаго живота́ порожда́й;

ра́дуйся, от скверн міра сего́ огражда́тися
ча́да своя́ науча́й.

Ра́дуйся, чту́щим тя ве́рный пред Бо́гом
хода́таю;

ра́дуйся, призыва́ющим тя непрело́жное
упова́ние.

Ра́дуйся, пра́ведне ста́рче Алексіе,
уте́шителю благода́тный.

Конда́к 9

Всем, притека́ющим к тебе́ в ско́рби,
наста́вник изря́дный яви́лся еси́, о́тче Алексіе,
подвиза́я лю́ди к пока́нию и самоуко́рению,
терпе́нию же в ско́рбех неисто́щиму, да за вся
сія́ благода́ряще, Бо́гу пою́т: Аллилу́иа.

И́кос 9

Витийству́ющий язы́к умо́лче, зря, ка́ко ты,
ста́рче Алексіе, служе́ние свое́ в простоте́
соверша́я и му́дрость ве́ка сего́ посрамля́я, вся́ку
горды́ню челове́ческую́ я́ко прах от лица́ ве́тра
возмета́л еси́. Сего́ ра́ди похваля́ем тя си́це:

Ра́дуйся, я́ко не хитросплете́нием словес, но
си́лою пра́вды Бо́жия ду́ши врачева́л еси́;

ра́дуйся, я́ко вознесе́нную горды́ню ве́ка сего́
смирением сокруша́л еси́.

Ра́дуйся, словесы́ свои́ми не кре́пость
челове́ческую, но си́лу Бо́жию явивы́й;

ра́дуйся, я́ко нестарéющую мúдрость
евáнгельскую жи́ву и де́йственну показáвый.

Ра́дуйся, исполненный ре́вности по Бо́же
Вседержителе;

ра́дуйся, уста́вов церко́вных ре́вностный
хранителю.

Ра́дуйся, иску́сный пробужда́телю со́вести
челове́ческия;

ра́дуйся, я́ко всем бысть вся, да спасéши
ду́ши, Бо́гом тебе́ вруче́нныя.

Ра́дуйся, пра́ведне ста́рче Алексíе,
утéшителю бла́гостный.

Конда́к 10

Спасéния несть во преселéнии в хлеборо́дныя
зе́мли, егда́ глад, мор и междоусо́бныя бра́ни
постига́ют страну́ на́шу, та́ко глаго́лал еси́, о́тче,
и трудо́сти учи́л еси́ приима́ти я́ко вразумле́ние
Бо́жие, за умноже́ние беззако́ния попу́щенное, и
непреста́нно в покая́нии взыва́ти: Аллилу́иа.

И́кос 10

Стена́ непоколебíмая упова́ния на Го́спода
яви́лся еси́, о́тче Алексíе, я́ко скала́ крéпкая,
пресеца́я трево́лнение житéйское, малоду́шие и
уны́ние в ду́шах люде́й, к тебе́ прибега́ющих и с
любо́вию зову́щих ти:

Ра́дуйся, адама́нте ве́ры несокруши́мый;

ра́дуйся, зла́то в горни́ле ско́рбей очи́щенное.
Ра́дуйся, разде́ливый с наро́дом ру́сским
ско́рби, Бо́гом низпо́сланныя;
ра́дуйся, глад и хлад прие́мый я́ко наказáние
Бо́жие.

Ра́дуйся, кúпно с прихо́жаны хра́ма чу́до
пла́ча ико́ны Богома́терни узре́вый;

ра́дуйся, наде́ждею на милосе́рдие Бо́жие
стра́ждущия ду́ши врачева́вый.

Ра́дуйся, стра́ждущим в беда́х ско́рое
поможе́ние;

ра́дуйся, призыва́ющим тя в ско́рбных
обстоя́ниях щит и огражде́ние.

Ра́дуйся, пра́ведне ста́рче Алекси́е,
уте́шителю бла́гостный.

Конда́к 11

Пе́ние всеуми́ленное прино́сим ти, о́тче
досточу́дне, прославля́юще блаже́нную кончи́ну
и погребéние твоё, моли́твами святи́теля и
испове́дника Ти́хона, Патриа́рха
Всеросси́йскаго, сопрово́жденное. Ве́руем, я́ко
предсто́ят вку́пе во све́те невече́рнем Престо́лу
Пресвяты́я Тро́ицы, вы́ну пою́ще: Аллилу́иа.

И́кос 11

Светоза́рен свети́льник яви́лся еси́, ми́лости
Бо́жия испо́лнен, и вели́кий купе́ц, умно́живый

таланты, яже даде тебе всех Бог, в житии бо твоём явил еси дары прозрения и исцеления, подвизая нас глаголати тебе похвалы сия:

Радуйся, яко от лет детских Господу верен был еси;

радуйся, многих дарований от Него сподобивыйся.

Радуйся, луча благодати, в мире явленная;

радуйся, ризами света Христова одеянный.

Радуйся, с преподобным Серафимом помогий обрести сына матери отчаявшейся;

радуйся, яко и ныне в трудных обстояниях о нас к Богу ходатайствуеши.

Радуйся, прозорливостию и чудотвореньми люди в вере стояти утвердивый;

радуйся, души, веры не имевшая, отеческим попечением и молитвою к Богу обративый.

Радуйся, праведне старче Алексие, утешителю благодатный.

Кондак 12

Благодати исполнен, яко сосуд Духа Святаго избранный, породил еси духом многая чада твоя, да зряще житие их, окрест живущия уразумеют, яко любовь в Боже к ближнему залог мира есть, и тако благодарственно воззовут Богу: Аллилуиа.

И́кос 12

Пою́ще жити́е твоё и прославлéние, вéруем,
я́ко многомо́щно е́сть пред Престо́лом
Влады́чим твоё за ны ходата́йство, сокрови́ще
же многоце́нное мо́щи твоя́ иму́ще, к ним
припада́ем я́ко к сосу́ду благода́ти
неисто́щиму и согла́сно ублажа́ем тя:

Ра́дуйся, гражда́нине Иерусали́ма небéснаго;
ра́дуйся, благи́й наста́вниче, возрасти́вый
ча́да своя́ во отце́в пресла́вных.

Ра́дуйся, я́ко был еси́ на земли́ хра́м живы́й,
Го́сподеви посвяще́нный;

ра́дуйся, я́ко предсто́иши днесь Престо́лу
Вседержи́теля.

Ра́дуйся, ста́рцев О́птинских собесéдниче;
ра́дуйся, кроншта́дтскаго свети́льника
сомолитвенни́че.

Ра́дуйся, я́ко общи́на твоя́ о́браз бысть
купножи́тельства христи́анскаго;

ра́дуйся, я́ко ча́да твоя́ свиде́тельством
крове́й своих Христа́ испове́даша.

Ра́дуйся, пра́ведне ста́рче Алекси́е,
уте́шителю бла́гостный.

Конда́к 13

О предивны́й па́стырю и тёплый о нас к Бо́гу
моли́твенниче, пра́ведне о́тче Алекси́е! Не
отри́ни нас немощны́х, соверша́ющих

похва́льное пе́ние си́е, и научи́ во́лю Бо́жию неле́нотно творі́ти, да сподо́бимся и в бу́дущем ве́це благода́рственно воспева́ти Творцу́ и Бо́гу на́шему: Аллилу́иа.

Молитва 1

К тебе́, о пра́ведне о́тче Алексі́е, мы, гре́шнии и недосто́йнии, притека́ем и со умиле́нием взыва́ем ти: при́зри ны́не ми́лостивно с высоты́ святы́я своея́ на Оте́чество на́ше и нас, тя прославля́ющих. Прие́мый в жити́и сво́ем тя́готы люде́й и се́рдцем ми́люющим понесы́й ско́рби их, приими́ в моли́твенное твоё предста́тельство и нас, грехми́ мно́гими обременённых и суето́ю ми́ра сего́ утружда́нных. В тебе́, о дивный старче, просла́вился Госпо́дь, явив тя тайнника́ ми́лости Бо́жия. Тя призыва́ем неотсту́пно: бу́ди врач ду́шам и телесе́м на́шим, уныва́ющим утёшитель, малоду́шным дерзнове́ние низпосли́, помраче́нных зло́бою всепроще́нию научи́, воздержа́нию спосо́бствуй. Воспламени́, благий де́лателью виногра́да Христо́ва, хла́дная се́рдца на́ша ре́вностию служе́ния твоего́, научи́ моли́тве непреста́нней и де́ятельней любви́ с утесне́нием себе́ блага́ ради́ бли́зних на́ших. Укрепи́ моли́твами тво́ими ча́да Це́ркве на́шей, да поживе́м в любви́ и ми́ре, а вне огра́ды церко́вныя пребы́вающія да уразуме́ют

Христову истину и вкупе с нами прославят Животворящую и Нераздельную Троицу и твое милостивное предстательство во веки веков. Аминь.

Молитва 2

О всечестный и преблаженный отче наш Алексіе, дивный старче Московский и вся Церкви Русския похвало и радование! Велию любовь ко Господу имея, заветы евангельския непреложно исполняя, душу твою за паству полагал еси, милующим сердцем болезнуя о всех, просящих твоея помощи. Приими малое сие моление наше, и яко в земном житии твоём отирал еси всяку слезу, облегчал еси всяку скорбь, тако и ныне, милосердый молитвенниче и ходатаю наш, возьми тяготы, болезни и скорби наша, исполни страждущая сердца радостью, умоли Человеколюбца Бога о прощении безчисленных прегрешений наших, да очистивше души покаянием, к деланию доброму приступим. Ей, старче благий, буди и нам пастырь добрый, наставляя на стезю спасения, да молитвами твоими безпорочно пройдем путь жития нашего и обрящем Отечество Небесное, идеже ты со Ангелы и всеми святыми предстоиши Престолу Святыя Троицы, прославляя Безначальнаго Отца со Единородным Его Сыном и Пресвятым, и

Благі́м, и Животворя́щим Его́ Ду́хом во ве́ки
веко́в. Ами́нь.

